



**LJEKARSKA – LIJEČNIČKA KOMORA
KANTONA SARAJEVO**
Ul. Sprečanska 5/III , Sarajevo

Na osnovu člana 29. Statuta Ljekarske – Liječničke komore Kantona Sarajevo (u daljnjem tekstu: Komora), člana 30. Pravilnika o odgovornosti članov Komore, Upravni odbor Komore na sjednici održanoj dana 09.11.2023. godine donio je:

POSLOVNIK O RADU SUDA KOMORE

Član 1.

Poslovníkom o radu Suda Komore (u daljnjem tekstu: Poslovník) utvrđuje se rad Suda Komore kao nezavisnog organa Komore.

Član 2.

Sud Komore je prvostepeni organ koji odlučuje o povredi dužnosti i/ili ugleda ljekarskog-liječničkog zvanja, u skladu sa Pravilnikom o odgovornosti članova Komore.

Član 3.

Sud Komore u skladu sa Statutom Komore ima 5 (slovima: pet) članova kojeg čine predsjednik/ca Suda Komore , zamjenik/ca predsjednika/ce i 3 (slovima: tri) člana Komore.

U slučaju da predsjednik/ca Suda Komore ne može vršiti funkciju, obavljat će je zamjenik/ca predsjednika/ce.

U slučaju spriječenosti predsjednika/ce i zamjenika/ce predsjednika radom Suda Komore predsjedava jedan od članova Suda Komore kojeg/ju odredi predsjednik/ca Komore.

Član 4.

Predsjednik/ca Suda Komore i zamjenik/ca predsjednika/ce Suda Komore bira se na prvoj sjednici Suda Komore između izabranih članova Suda Komore.

Član 5.

Sud Komore je dužan da po prijemu spisa, a u roku od 30 (slovima: trideset) dana donese i objavi odluku u prisutnosti stranaka.

Odluka Suda Komore punovažna je ako je za istu glasala nadpolovična većina ukupnog broja imenovanih članova Suda Komore.

Član 6.

Odlukom, zahtjev za pokretanje postupka utvrđivanja povrede dužnosti i/ili ugleda ljekarskog zvanja može biti odbačen kao neblagovremen i neuredan ili odbijen u cijelosti ili djelimično kao neosnovan ili osumnjičeni proglašen odgovornim za povredu dužnosti i/ili ugleda ljekarskog zvanja koji mu se zahtjevom za pokretanje postupka utvrđivanja povrede dužnosti i/ili ugleda ljekarskog zvanja stavlja na teret, u kom slučaju će sadržavati i odluku o disciplinskoj mjeri.

Odluka će se objaviti i kada osumnjičeni i nadležni tužilac nisu prisutni njezinom objavljivanju.

Izvodnik Odluke se unosi u zapisnik, bez navođenja kako je pojedini član Suda Komore glasao, a zapisnik se odlaže u kovertu koja se odmah zatvara i pečati. Ovu kovertu nije ovlašten da otvori bilo koji organ, izuzev Suda Komore.

Član 7.

Prilikom određivanja vrste i težine disciplinske mjere propisane Pravilnikom o drugostepenom disciplinskom postupku pred Ljekarskom – Liječničkom Komorom F BiH, Sud Komore je dužan cijeniti sve okolnosti propisane zakonom, Statutom Ljeakrske – Liječničke komore Kantona Sarajevo, Statutom Ljeakrske – Liječničke Komore F BiH i Kodeksom medicinske etike i deontologije.

Član 8.

Najkasnije u roku od 8 (slovima: osam) dana po objavljivanju Odluke, njezin pisani ottrapavak će se dostaviti strankama u postupku.

Član 9.

Protiv odluke Suda Komore dopuštena je žalba u roku od 15 (slovima : petnaest) dana od dana prijema pisanog otpravka iste Sudu Ljekarske – Liječničke Komore Federacije BiH.

Žalba se podnosi Sudu Komore u dovoljnom broju primjeraka za Sud Komore i stranke u postupku.

Sud Komore u roku od 8 (slovima : osam) dana od dana prijema žalbe dostavlja žalbu na odgovor strankama u postupku koje mogu u roku od 3 (slovima: tri) dana dostaviti odgovor na žalbu.

Sud Komore dužan je u roku od 8 (slovima: osam) daja po prijemu odgovora na žalbu ili po proteku roka za davanje odgovora na žalbu, prije dostavljanja žalbe Sudu Ljekarske – Liječničke Komore F BiH istu ispitati u skladu sa Pravilnikom o drugostepenom disciplinskom postupku pred Ljekarskom – Liječničkom Komorom F BiH i istu u daljem roku od 8 (slovima: osam) dana dostaviti Sudu Ljekarske – Liječničke Komore F BiH.

Član 10.

Ovaj Poslovník stupa na snagu danom donošenja.

Stupanjem na snagu ovog Poslovníka, prestaju da važe odredbe Poslovníka usvojenog na sjednici Upravnog odbora dana 16.09.2020. godine, kao i sve naknadne izmjene istog.

Broj: 1247 /2023

U Sarajevu 09.11.2023. godine

Predsjednica Upravnog odbora Komore

prim.mr.sci.med.dr Sanela Vesnić



